

Tatini sinovi

(ili kako pomoći vlastitoj djeci)

Čovjek se zove Götz Wolfgang Werner i njegovo ime samo po sebi većini nas ne znači baš puno. Vlasnik je jednog od najvećih lanaca drogerija (prisutnog i našoj državi) DM. E, čovjek je lijepo ovih dana objavio da će svoj udio u DM-u (cirka nekih milijardu eura) ostaviti humanitarci-ma. Što se djece tiče, a ima ih sedmero, dobili su dobre temelje, odnosno, obrazovanje, pa dalje kroz život mogu sami...

Ne znam kako su Wernerova djeca reagirala na očevu odluku među četiri zida, u medijima se nisu oglašavali...

I dok sam u okolini slušala kojekakve komentare koji su se kretali od divljenja do konstatacije da je "stari, zapravo, odlijepio", nisam se mogla osloboditi pomisli kako bi pojedini ovdašnji "tatini sinovi" reagirali da im tata ili babo jedno jutro ustane i odluči babovinu (koju je naravno sam stekao) im ostaviti tamo nekakvoj fondaciji, humanitarnoj organizaciji ili... Većina tatinih sinova koje znam (a ni kćerima nije mane), smrtno bi se naljutili na rodenog oca, ganjali ga po sudu (a bilo bi i sjekirom po avliji).

Da budem poštena, ni maslo roditelja nije za ramazana (koliko sam puta samo čula "bolje da mi kod kuće džaba sjedi, nego da trči i radi za 350 KM").

Iskreno, koliko znate roditelja koji žele da im dijete krene od metle, pa da jednog dana dođe do mjesta direktora kompanije (ja ih na prste jedne ruke mogu prebrojati). Puno je više onih koji sanjaju da im se djeca uhlebe u visokoprofitnom javnom preduzeću, nekoj međunarodnoj organizaciji ili državnoj administraciji, nebitno na kom nivou, redovito bez odgovarajućih kvalifikacija (ionako im je glavna referenca "sin ili kćerka tog i tog").

Ne znam zašto, ali mi se po glavi stalno vrti priča mog rahmetli djeda o starijem čovjeku koji je jednu noć slučajno čuo kako se sin i snaha dogovaraju da ga smjeste u starački dom, jer u kući nema dovoljno mjesta za njih i njihovog sina. Starac cijelu noć oka ne sklopi, ujutro porani i pravac u sud, pa kuću prepisa na unuka. Kada je sin čuo šta je otac uradio, podvrisnu na oca "Pa, šta uradi, čovječe?"

"Pomažem tvome sinu, sine", kratko je odgovorio otac. Tako to ide na ovim prostorima... **B**

Aida Delić,

Glavna i odgovorna urednica